

CONSELLERÍA DO MEDIO RURAL

Orde do 13 de marzo de 2009 sobre aprobación dos plans de prevención e defensa contra os incendios forestais de distrito.

O marco normativo xeral de referencia en materia de prevención de incendios forestais vén determinado, en canto ás competencias de Galicia, polo artigo 27.10º do seu Estatuto de autonomía en relación cos artigos 148.18º e 149.123º da Constitución española de 1978.

Facendo uso destas competencias, aprobouse a Lei 3/2007, do 9 de abril, de prevención e defensa contra os incendios forestais de Galicia que, no capítulo II do título II, baixo a rúbrica de planificación da defensa do espazo rural, atribúe aos plans de prevención e defensa contra os incendios forestais de distrito a función de desenvolvemento das orientacións previstas no Plan de prevención e defensa contra os incendios forestais de Galicia, concretando a estratexia de distrito.

A planificación da defensa do espazo rural fronte aos incendios forestais no ámbito do distrito ten por obxecto integrar a prevención e a extinción nunha lóxica de colaboración entre todas as administracións e os cidadáns, fixando as liñas de avance que permitan acadar a óptima protección das persoas, dos núcleos rurais e do ambiente.

Correspóndelle ao conselleiro do Medio Rural a aprobación dos plans de prevención e defensa contra os incendios forestais de distrito, logo da súa elaboración polas delegacións provinciais da Consellería do Medio Rural garantindo a coherencia entre distritos forestais.

Mediante a Orde do 7 de maio de 2008 pola que se someten a información pública as propostas dos plans de prevención e defensa contra os incendios forestais de distrito en Galicia (DOG do 14 de maio), garantiuse a participación das diferentes administracións, entidades, asociacións do sector e persoas propietarias afectadas. Así mesmo, realizouse consulta á Consellería de Medio Ambiente e Desenvolvemento Sostible en cumprimento do artigo 15.4º da Lei 3/2007.

A definición das zonas de alto risco de incendios no ámbito municipal na Orde do 18 de abril de 2007 pola que se zonifica o territorio con base no risco espacial de incendio forestal (DOG do 24 de abril), o establecemento dun nivel municipal de planificación na Lei 3/2007 e os plans municipais de emerxencia definidos na Lei 5/2007, do 7 de maio, de emerxencias de Galicia, permite agrupar estes instrumentos.

Polo exposto, en virtude do establecido no artigo 15.2º da Lei 3/2007, do 9 de abril, de prevención e defensa contra os incendios forestais; no Decreto 562/2005, do 1 de decembro, polo que se establece a estrutura orgánica da Consellería do Medio Rural e do Fondo Galego de Garantía Agraria, e no uso das facultades que me foron concedidas pola Lei 1/1983, do 22 de febreiro, reguladora da Xunta

e da súa Presidencia, por proposta da Dirección Xeral de Montes e Industrias Forestais,

DISPOÑO:

Artigo 1º.-Aprobación dos plans de prevención e defensa contra os incendios forestais de distrito.

Apróbanse os plans de prevención e defensa contra os incendios forestais de cada un dos 19 distritos forestais, que comprenden os documentos que figuran no anexo.

Artigo 2º.-Publicidade.

Ponse á disposición dos interesados a documentación correspondente aos plans a través da páxina web da Xunta de Galicia (<http://mediorural.xunta.es/>), nas oficinas das delegacións provinciais da Consellería do Medio Rural e na Dirección Xeral de Montes e Industrias Forestais da Consellería do Medio Rural.

Artigo 3º.-Plans municipais de prevención e defensa contra os incendios forestais e plans específicos de defensa nas zonas de alto risco de incendio.

Os plans municipais de prevención e defensa contra os incendios forestais e os plans específicos de defensa nas zonas de alto risco de incendio redactaranse nun único documento integrado no Plan de prevención e defensa contra os incendios forestais de distrito e no Plan municipal de emerxencias.

Disposición derradeira

Única.-Entrada en vigor.

Esta orde entrará en vigor o día seguinte ao da súa publicación no *Diario Oficial de Galicia*.

Santiago de Compostela, 13 de marzo de 2009.

Alfredo Suárez Canal
Conselleiro do Medio Rural

ANEXO**I. Memoria.**

I.1. Antecedentes e xustificación.

I.2. Obxectivos.

I.3. Ámbito territorial.

I.4. Análise da situación actual.

I.5. Definición da rede de defensa contra os incendios forestais no distrito.

I.6. Propostas de actuación.

I.7. Calendario de aplicación.

I.8. Análise económico-financeira.

I.9. Control do plan.

II. Anexos.

II.1. TECOR e coutos.

II.2. Análise estatística.

II.3. Parroquias segundo prioridade de actuación.

II.4. Puntos de auga.

II.5. Puntos de vixilancia fixa.

II.6. Bases para medios aéreos e terrestres.

II.7. Estacións meteorolóxicas e repetidores.

III. Mapas.

III.1. Topográfico.

III.2. Infraestruturas de defensa.

III.3. Zonificación.

III.4. Prioridade de actuación.

III.5. Isócronas aéreas.

III.6. Redes de xestión de biomasa.

CONSELLERÍA DE MEDIO AMBIENTE E DESENVOLVEMENTO SOSTIBLE

Decreto 59/2009, do 26 de febreiro, polo que se regula a rastrexabilidade dos residuos.

O Decreto 221/2003, do 27 de marzo, polo que se establece un procedemento simplificado no control dos traslados de residuos perigosos producidos por pequenos produtores de residuos, facendo uso das facultades previstas na Lei 10/1998, do 21 de abril, de residuos, e tomando como referencia o Real decreto 833/1988, do 20 de xullo, polo que se aproba o regulamento para a execución da Lei 20/1986, do 14 de maio, básica de residuos tóxicos e perigosos, estableceu un réxime simplificado no control dos traslados dos residuos perigosos producidos polos pequenos produtores, entendidos como aqueles que xeran menos de 10.000 quilos ao ano destes residuos dentro do ámbito territorial de Galicia.

Esta norma resultou de utilidade e cun alto grao de aceptación en canto ao sistema de control, porén limitou o seu ámbito de aplicación aos pequenos produtores de residuos perigosos. Neste sentido, quedan fóra do seu ámbito de aplicación aqueles produtores que superan esta cantidade, aínda que nalgúns casos os residuos enviados en cada traslado sexan en cantidade e perigosidade equiparables aos enviados polos pequenos produtores. Esta situación xustifica a ampliación do procedemento simplificado de traslados a todos os produtores de residuos perigosos, con independencia da cantidade de residuos que anualmente produzan.

Considérase necesario, ademais, establecer un protocolo que regule as transmisións de residuos perigosos e non perigosos entre produtores e xestores, ou entre estes últimos, de tal xeito que se determine en todo momento quen é o responsable do residuo cando se traslada e cando se xestiona.

A capacidade técnica e económica dalgúns dos colectivos afectados polos procedementos e obrigas previstas neste decreto, xunto co feito de contar coas ferramentas e a experiencia necesarias por parte da Administración, permiten facer uso da potestade prevista na Lei 11/2007, do 22 de xuño, de acceso elec-

trónico dos cidadáns aos servizos públicos, e establecer a utilización de sistemas telemáticos para a tramitación dos traslados de residuos perigosos dentro da Comunidade Autónoma de Galicia, así como para a súa anotación no libro rexistro previsto nos artigos 13.3º e 23 da Lei 10/1998, do 21 de abril, de residuos. Iso permitirá, ademais dun coñecemento en tempo real dos datos relevantes relacionados cos residuos, axilizar os trámites e o cumprimento das obrigas por parte dos usuarios. Esta nova regulación supón, en definitiva, unha simplificación administrativa dos procedementos relativos aos traslados dos residuos perigosos e non perigosos.

A publicación do Real decreto 105/2008, do 1 de febreiro, polo que se regula a produción e xestión dos residuos de construción e demolición, norma estatal básica, fai necesario adecuar a regulación autonómica nesta materia. Desta forma procédese a establecer un réxime común de obrigas para os produtores de residuos non perigosos e para os produtores de residuos de construción e demolición, categoría específica dos primeiros, evitando así a existencia de controis diferentes para actividades co mesmo risco ambiental.

Por último, o 18 de novembro de 2008, publícase no *Diario Oficial de Galicia* a Lei 10/2008, do 3 de novembro, de residuos de Galicia. Esta lei ten por obxecto, conforme prevé o seu artigo 1, previr a produción de residuos, establecer o réxime xurídico xeral de produción e xestión deles, e fomentar, por esta orde a súa redución, reutilización, reciclaxe e outras formas de valorización e a regulación dos solos contaminados, co fin de protexer o ambiente e a saúde humana.

O título V da Lei 10/2008, do 3 de novembro, dedícase ao réxime de intervención administrativa da produción e xestión de residuos, cuxa regulación está directamente relacionada co obxecto deste decreto, principalmente no procedemento de control dos traslados de residuos perigosos e non perigosos.

De acordo co disposto na Lei 10/1998, do 21 de abril, de residuos e, en cumprimento e execución do disposto na disposición derradeira primeira da Lei 10/2008, do 3 de novembro, de residuos de Galicia, este decreto regula a rastrexabilidade dos residuos, co fin de ter en cada momento un control preciso dos traslados dos residuos.

Por todo isto, por proposta do conselleiro de Medio Ambiente e Desenvolvemento Sostible, de acordo co ditame do Consello Consultivo de Galicia e logo da deliberación do Consello da Xunta de Galicia na súa reunión do día vinte e seis de febreiro de dous mil nove,

DISPOÑO:

Artigo 1º.-*Obxecto e ámbito de aplicación.*

Este decreto ten por obxecto:

a) Establecer o procedemento de control dos traslados de residuos perigosos e non perigosos, incluídos no ámbito de aplicación do Decreto 174/2005, do 9 de xuño, polo que se regula o réxime xurídico da pro-